






杏園雅集圖















言水周公述
















杏園雅集序

古之君子其閒居未嘗一日而忘天下國家也  
矧承祿僭爵以事君而有自逸者乎詩曰夙夜  
匪懈以事一人古之賢臣所以事其君也今之  
居承明延閣者職在文學論思然率寅而入酉  
而出恭勤左右猶恒歆焉慮毫分之或闕矧敢  
自逸者乎固盡其分之當然也若勞息張弛之  
宜則雖古之人有所不廢焉乃正統丁巳三月  
之朔當休暇南郡楊公及余八人相與遊於建





安楊公之杏園而永嘉謝君庭循來會園有林  
木泉石之勝時卉競芳香氣芬菲建安公喜嘉  
客之集也凡所以資娛樂者悉具客亦欣然如  
釋羈策濯清爽而遊於物之外者賓主交適清  
譚不窮觴豆肆陳歌詠並作於是謝君寫而為  
圖嗟夫一日之樂也情與境會而于冠衣之  
聚皆羔羊之大夫備菁莪之儀洽臺菜之意又  
皆不忘乎衛武自警之心可為庶幾古之人者  
題曰雅集不其宜哉故遂序於圖之次而詩又

次焉

廬陵楊士奇序

鞠躬奉臣職肅肅恒自旦朝下趨經幃臨夕出  
東觀釐務日有常黽勉在文翰衰齡負宿痾寧  
不懷泮渙茲辰屬休沐聯鑣越閭閭適我同志  
良蕭爽坐林館維時天宇澄青陽候過半好鳥  
鳴交交芳卉羅絢爛朱絃一再彈圖帙亦娛玩  
中筵錯肥甘觴竿行無筭偶斯一餉樂沉鬱豁  
舒散雅詠含宮商高懷薄雲漢合歡情所洽輔



仁道攸贊各期勵乃脩庶用表楨幹

士奇

惠風扇和氣萬物熙春陽顧茲紅杏園花開正  
芬芳在公稍休暇况復遇時康爰與衆君子開  
筵泛華觴群情愜清賞為歡殊未央緬懷洛中  
會九老皆令望娛意今則同撫迹非所當幸逢  
聖明主恭已臨萬方吾儕忝在職豈敢忘贊襄載歌  
蟋蟀詩好樂期無荒

建安楊榮

大和暢群芳斯文屬清暇况復名園中樂事寬  
幽雅達觀不遐遺同仁仰  
神化願茲春陽輝徧照履盆下

南郡楊溥

勝日遊名園欣時遂休沐逍遙列冠蓋俯仰窺  
化育輕風扇微暄鳴鳥出幽谷林杏花正繁芳  
蒲葉初綠群卉一何妍紛敷播清馥舉觴矚麗  
景主勸賓屢復一飲詠臺萊再飲歌伐木為歡  
情所孚既醉禮尤肅慚予屬末坐咳唾乏珠玉



趙陪幸無棄道義永相篤

金谿王英

穆穆春陽杏花既繁爰與君子樂此中園  
鳴鳥在上芳草在下惠風徐來心焉孔豫  
豈無旨酒亦有嘉穀載勸載酬以永今朝  
時之和矣物亦遂只

天子萬年德音不已

右四章章四句

泰和王直

東城地佳麗獨此名園勝維時春日暄繞徑皆  
紅杏館閣屬休暇共喜逢

明聖群公遂過從濟濟冠纓盛觴酌屢獻酬雍容相  
愛敬方投穎中轄且盡關西興豈無絲竹音雅  
詠足怡性久坐酒欲醒徐行天未暝丹青託容  
貌秀氣森相映良會欣在茲非才愧難稱為此  
今日歡誰云昔賢迥高風諒可追願與洛中並

廬陵周述

踈雨過城關草木生華滋良辰得清暇可以遂



遨嬉杏園既幽雅亭館亦暈蜚林深日色淨花  
發香風隨鶴舞臨廣除鶯鳴在高枝景會神已  
超目暢心自怡從來調鼎資能幹造化機萬彙  
各有適而我亦奚為陶然發孤詠焉知西日微

安成李時勉

日出天宇淨惠風汎芳園杏花暖始繁幽鳥時  
自喧朝回一來集隆隆駐輕軒君子雅好客文  
燕忘囂煩嘉肴陳廣席旨酒盈華尊抽毫發浩  
倡傾座聆清言良辰屬休沐皆云荷

君恩嘉會諒難遇斯樂焉可諉

文江錢習禮

濟濟儒林彥晨下玉堂直時和景物麗駕言適  
所適芳圃負城隅坦蕩囂氛隔長松蔭仙葩流  
杲湛寒碧展席藹蘭熏開尊注瓊液主賓諧瑟  
琴賡歌協金石蕭散樂和洽從容見儀則視彼  
山陰遊清談竟奚益

泰和陳循

杏園雅集後序



正統二年丁巳春三月朔適休暇之晨館閣諸公過予因延於所居之杏園永嘉謝君廷循旅寓伊邇亦適來會時春景澄明惠風和暢花卉競秀芳香襲人觴酌序行琴詠間作群情蕭散衍然以樂謝君精繪事遂用着色寫同會諸公及當時景物倚石屏而坐者三人其左少傅廬陵楊公其右為榮左之次少詹事泰和王公傍杏花而坐者三人其中大宗伯南郡楊公左少詹事金谿王公右侍讀學士文江錢公徐行後

至者四人前左庶子吉水周公次侍讀學士安成李公又次侍講學士泰和陳公最後至者謝君其官錦衣衛千戶而十人者皆衣冠偉然華髮交映又有執事及傍侍童子九人治飲饌儼從五人而景物趣韻曲臻于妙廬陵公喜題曰杏園雅集既序其端復與諸公賦詠成什乃屬予識其後仰惟

國家

列聖相承圖惟治化以貽永久吾輩忝與侍從涵濡



深恩蓋有年矣今

聖天子嗣位海內宴安民物康阜而近職朔望休沐  
率循舊章予數人者得遂其所適是皆

皇上之賜圖其事以紀太平之盛蓋亦宜也昔唐之  
香山九老宋之洛社十二耆英俱以年德高邁  
致政閒居得優游詩酒之樂後世圖之以為美  
談彼固成於休退之餘此則出於任職之暇其  
適同而其跡殊也然考其實爵位履歷非同出  
一時聯事一司今予輩年望雖未敢擬昔人而


膺密勿之寄同官禁署意氣相孚追視昔人殆  
不讓矣後之人安知不又有羨於今日者哉雖  
然感

上恩而圖報稱因宴樂而戒怠荒予雖老尚願從諸  
公之後而加勉焉

榮祿大夫少傅工部尚書兼

謹身殿大學士楊榮書













竹園壽集圖






















律符王公繼

烏程閔公珪



舒城秦公民悅

呂君文英

呂君文英









竹園壽集序

太子太傅吏部尚書鄆屠公太子少保戶部尚書陽曲周公都察院右都御史鄆城侶公同生正統庚申至今弘治己未同躋六十侶公之生差先屠公稍後介其中為周公乃五月四日也是日諸僚友若戶部尚書祥符王公太子少保左都御史烏程閔公吏部右侍郎舒城秦公戶部左侍郎靈寶許公右侍郎睢州李公右副都御史臨淮顧公及予七人即周公私第之後園





置酒合賀觴豆既陳冠裳輝映勸酬交錯俯仰  
有容及就坐清風習習入窓檻來若破新暑酒  
政斯行樂音具舉談笑歡呼起坐成旅情好甚  
洽賓主盡醉皆以為自有壽筵以來無若此盛  
者予忝預茲集乃首賦四韻為倡諸公咸和之  
秦公別集古句諸公又和之周公復自有作又  
咸和之皆以為自有壽章以來亦無若此盛者  
一時觀者相與稱羨以為三公官爵尊顯福履  
隆厚豈非

當朝人物之傑出者歟予曰是固然然三公所以  
致此者亦豈易哉當其蚤歲刻厲學業始登甲  
科及既入官

朝廷歷試以事累建勞績始列大僚然位益高則  
責益重故夙夜在公鞠躬盡瘁恒惴惴然以恐  
掄擇人才以任庶事恐瘵厥官劑量儲蓄以資  
國用恐厲厥民振揚風紀以率群吏恐骫厥法  
仰思未得真有古人終夜不安寢之意是以人  
見其今之壽耳不知其平生履歷之多見其今



之樂耳不知其中心憂畏之至彼僥倖之是圖  
逸豫之是耽如世小夫之所為欲享其壽且樂  
不可得者則所以致此者果易乎哉夫三公所  
以有今日者固出於自致亦惟其身之遭際耳  
蓋生全盛之世立重熙之

朝頤

聖天子在上優禮之愈加信任之不貳得以成其壽  
且樂者不然亦豈可得哉衆以為然乃更舉觴  
以祝三公曰願自今躋于上壽黃髮在位益竭

謀猷以副

聖天子倚毗之心三公亦舉觴以酬曰願諸公同心  
以輔

聖政流無窮之聞為

邦家光祝已衆授簡請載之予曰賓主之意見於  
今日之所倡和者已盡此可略曰意之篤者詞  
必複其何略之有乃載之是集也坐有善繪事  
者為錦衣二呂君屠公授宣德初館閣諸老杏  
園雅集故事曰昔有圖此獨不可圖乎二君遂



欣然模寫各極其態因按其次第繫於卷中其  
始並湖石坐者左為侶公右為許公一童子拍  
手導鶴舞以娛之周公坐稍遠使其二子共具  
伯曰太學生孟捧杯前行仲曰刑部主事曾方  
拱立聽命並立竹間者左為李公右為顧公皆  
凝然有思若索句狀屠公則章已成一童子捧  
硯從竹下書據石案而題卷者為予共案坐而  
持筆者為王公執麈尾者為閔公亦若有思者  
獨坐而握卷則為秦公其集句已就之時歟若  
二君左為紀右為文英展畫並觀而圖終焉園  
中草木非一種而竹多且茂故以竹園壽集題  
卷首卷成轉寫各得一卷藏于家又出屠公之  
意云吏部左侍郎長洲吳寬序

七客同期賀誕辰古詩三壽句猶新合為一百  
八十歲總是東西南北人露下高松如細雨風  
回脩竹滿清塵杏園雅集今重見良史當筵亦  
寫真

予惟乙卯是生辰老大無聞白髮新韓子立朝



猶此秩溫公入會獨何人

溫公入真率會亦年六十五

瞥然

一世同驚電瞠若三公豈後塵更待他年為此

集香山容我作劉真

長洲吳寬

壽喜三山共一辰

周公號松露山人伯公獨山予丹山也

蕭蕭華

髮漸添新爭如伯玉能希聖

蓬伯玉行年六十而化

徒仰

宣尼善誘人

孔子六十而耳順

我已龍鍾携短策

古人六十

杖於鄉

誰能矍鑠淨邊塵

馬援六十二征武陵蠻

夢中曾學

斑斕舞惆悵醒來却不真

老萊子年七十着斑斕衣學嬰兒戲以樂

其親予家君在堂不能歸侍臨紙悵然

憶昔歲君今日辰

會日值庚申

恍疑花甲又更新鶴

雛秀頂不離母康女養茸常避人樽傍綠雲傾

白酒酌涵蒼雪洗紅塵叮嚀二呂休停筆脩竹

青青待寫真

節到端陽隔四辰梟羹蒲酒預嘗新已從

天上頒絲縷

先是三日蒙賜五絲絲縷

何用門前挂艾人鳳尾

竹長添秀色馬櫻花發落香塵

即夜合花

諸公咲我

成狂客刻曲湖山待季真



丹山屠滸和

宦途多少嘆參辰  
幸盍朝簪樂事新  
祝壽獨憐松露愧  
濟時當繼杏園人  
階翻夜合香飄席  
窓繞簷簷淨絕塵  
絃管雖離杯竿送  
襟懷益覺醉來真

太原周經和

華甲欣同值誕辰  
衣冠共荷

寵恩新稱觴北冀  
崇三友祝壽南山  
恰七人風細竹溪  
鳴碎玉雨香花塢  
浥芳塵幾回舞袖  
喧絃管

醉却樽前露性真

開封王繼和

夏五初臨第一辰  
小園幽雅物華新  
高朋自古稱三壽  
賀客于今見七人  
家在

帝城稀有竹門臨  
闌却無塵斯文燕集  
衣冠盛寫入丹青定  
逼真

三卿華誕總芳辰  
甲子循環又復新  
解慍微風頻動竹  
催詩涼雨更留人  
謾聽曲奏南飛鶴  
笑看波揚東海塵  
草色滿庭松露濕  
此君相對意



清真

吳興閔珪和

佳會叨倍在此辰竹園雨過一番新  
衣冠盛事傳良史賓主歡情勝故人  
文字飲酣留月色管絃聲沸拂梁塵  
殷勤為語同庚客百歲相期此意真

西鄆侶鍾和

天生諸老際

昌辰佑我

皇明事業新好學遠宗東魯叟豪吟近逼盛唐人  
弼成中夏遵王道坐使邊疆息虜塵一弛一張文武  
事杯行杯讓見天真

南舒秦民悅和

嘉筵傍竹愛茲辰况復三公壽酒新  
甲子元無終竟地乾坤合有老成人  
清風他日應留節好雨先期似洗塵  
臺省高勲慚乏頌短歌聊爾道吾真

桃林許進和



兩恬風靜值良辰物意人情與共新台揆聯階

官八座庚申週甲壽三人亭開東郭餘芳韻燕

集西城踵後塵東郭草亭在揚鴻臚處西城燕集在王學士處皆正統間故事

比德試看庭下竹天然標格更清真

睢郡李孟暘和

芳筵初啓慶佳辰好景園亭竹樹新三壽乃同

天下老百年期遇會中人飛觥暢飲渾無筭拂

塵清談迥絕塵盛事自應成故事寫圖還藉絲

毫真

鳳陽顧佐和

綠竹如簣

洪

樂彼之園

鶴

凱風自南

凱

賓之初

筵

賓之

朋酒斯饗

七

伐鼓淵淵

采

芭樂只君子

南

有臺壽考萬年

信南

綠竹如簣

洪

鳥鳴嚶嚶

伐

淑人君子

鳩

展也大

成

陣

儼爾籩豆

常

鼓瑟吹笙

陳

鳴于胥樂兮

有

和且平

那

三壽作朋

閔

為龍為光

蓼

敬慎威儀

民

勞散衣繡

裳

終

肆筵設席

行

並坐鼓簧

車

之屏之翰

葉



畜萬邦節南

綠竹三章章八句

右集古

民悅

有客有客

詩有客

遊于北園

鐵

依彼平林車園布

几筵

春秋左傳

獻酬交錯

詩楚

秉心塞淵

定之以佐

天子六

天子萬年

江漢

彼狡童兮

詩狡童

素歎嘍嚶

韓文

彼君子兮

詩有秋之杜

迄用有成

維清

今夕何夕

綢繆

吹叢蕭之笙

續仙以

介眉壽

詩七月

終和且平

伐木

豈弟君子

詩旱麓

邦家之光

南山有臺

服其

命服

采芑

裳錦褰裳

丰

今夕何夕

見前章

調笙竽

禮記

以介眉壽

見前章

揉此萬邦

詩菽高

有客三章章八句

集古

次韻自昔罕有况今所集庭嚶笙簧等韻

本經中不多得雖有一二已為諸公采用者不可重出因思漢晉以來樂章多用經史百家語樂章亦詩之流遂倣此體取禮記史傳及韓文語補之

瀟和



嘉賓式燕以樂南有嘉魚無踰我國將仲子酌彼康爵

賓之或肆之筵行常初筵鸛鳴于垤東魚躍于淵早德

音孔昭康胡不萬年鳴

卉木萋萋出鳥鳴嚶嚶伐宜言飲酒文曰無棄

爾成漢雲沈爵奠斚行鼓瑟吹笙鹿和樂且耽常

四方既平漢

邦人諸友沔休有烈光載正直是與小與子同

裳無自公退食羔吹笙鼓簧鹿媚茲一人下保

其家邦瞻彼

嘉賓三章章八句嚶笙二字詩中無可窮故也如詩人有疊用

例如以享以祀以今景福雅意皆有孔予存而不去豈亦不嫌其同

經和

竹園雅集擬之杏園波美主人對竹出進載歌

載賡清思如淵以樂有觴以慶壽年於園雅集

笑語嚶嚶於斯公暇燕樂初成薰風南來鳥韻

若笙願言匪懈答此并平竹園雅集樽俎之光

庭鶴起舞縞衣玄裳更愛松濤如奏絲簧一時

盛事傳之家邦



竹園三章章八句

鍾和

莫莫葛藟

詩早

近周家園

賦開居

綠竹純茂

魏都賦

授几肆筵

詩曲水

假樂君子

詩假

其心塞淵

燕壽

考維祺

詩行

於斯萬年

武下

黃鳥于飛

詩葛覃

關關嚶嚶

賦東京

式燕嘉會

陸士龍詩

福祿來成

詩鳥

酌言醕之

葉瓠

左篴右笙

子建

歌以詠

陸士衡詩

四宇和平

枚乘

豈弟君子

詩洞

休有烈光

載禮儀

卒度

楚玄見

丹裳

潘安

酌彼兕觥

詩卷

以振幽簧

賦宜其遐

福

詩駕

論道經邦

書周

葛藟三章章八句

進和

籊籊竹竿

詩竹

賁于丘園

易

來游來歌

詩卷

堂以筵

禮

樂只君子

詩南山

秉心塞淵

方中之式

燕且喜

車

壽考萬年

信南山

綠竹青青

詩淇

孤鳥嚶嚶

潘岳

樂只君子

詩南山

臺福祿來成

詩鳥

穆穆厥聲

那切

於竿笙

晉成



賦式燕以衍

詩南有嘉魚

四方既平

常武

溫溫恭人

詩小宛

謙尊而光

易

式序在位

詩時

裳

錦褰裳

卡

彼何人斯  
訶巧言如簧

巷伯

胡不相畏

正雨無

保其家邦

瞻彼洛矣

竹竿三章章八句

孟暘和

三人生年同庚申雅集卜吉復此辰雨師滌炎

豈天意憲獄停鞠如我因偉矣七賢才冠世美

哉二史筆有神竹園竹園爾何幸佳圖高詠傳

無垠

經

樓臺雨過日已申蒼涼光景還如辰蓮葉龜來

似有意花間鵲噪偏知因諸老春風常滿座二

方秋水同為神

周公二子長名孟國子生次名曾刑部主事

酒闌花

暮出門去白雲一片橫海垠

涼薄寧思福祿申幸逢二老同生辰荏苒光陰

屆六袞侵尋衰病論三因酒吸碧筒易酩酊詩

題粉節偏精神囑付黃鸝莫留客高山流水思



朱垠

迂踈常愧甫與申竭忠報

國當斯辰四方幸際

聖明日庶職肯究飢寒因陟罰從來出

天子操存誰敢欺明神願言各守聖賢訓輔翊

明皇安九垠

瀟和

維嶽英靈生甫申華辰又際太平辰歌聲送酒  
原無筭花氣侵人似有因竹底吟成新句語筆

端摹出舊精神叨陪此日真嘉會贏得名留滿

八垠

繼和

花甲齊周五遇申還同聽履上星辰酒宜介壽  
應無筭饌不求奢似有因松竹當軒堅晚操葵  
榴着雨關精神孤南縣象德星聚光燭三台動  
八垠

休衙每自日過申竹圃開筵正及辰暑酷欲憑  
風暫解獄停可是雨相因人躋壽域天重眷客



1435  
到詩壇筆有神愧我稀年無寸補只宜歸釣五  
湖垠

珪和

嵩嶽百年生甫申愧我何人同此辰高情不隨  
時態變盛會似有夙世因對酒何須問爾汝開  
談便覺驚鬼神共期努力事

明主留取清名傳九垠

鍾和

莫較生年卯與申

寬乙卯生  
公庚申

忝登科甲亦為辰

1460  
公庚辰進士  
寬壬辰

固知三壽今難並幸作同官舊有

因節挺歲寒依竹祖陰連夜合對花神吾

皇錫福真能助願築春臺滿九垠

寬和

1464  
天天氣象復申申三壽齊高值此辰岳降匡時

端有為天留華

國豈無因賓容飄洒溫如玉詩思清新捷似神嘉會

筠園今盛事定應傳播及邊垠

民悅和



三老詩名過白申更看壽集及良辰生年共值

金行位報

德難忘玉燭因花到楚前偏醞藉竹當雨後倍精神  
披圖謾說蘭亭好茲會風流詎有垠

進和

嶽降真應自詩中竹生况是日逢辰

舊傳種竹用辰日山

谷竹須辰日斲是也

是日會竹園故云  
賢才間出信非偶物理潛

窺似有因勲業光明昭汗簡畫圖瀟洒瑩風神  
壽觴三百詩千首興倚蓬山樂未垠

孟賜和

川嶽降靈生甫申

明良千載逢昌辰階崇保傳德乃稱任專風紀才所  
因南山壽同天與福北海尊滿詩有神斯文之  
交豈浪集美談會見誇八垠

佐和

序竹園壽集圖詩後

高年相會而為壽同道相聚而為樂古之人往  
往有之如宋文潞公之耆英會蘇東坡之西園



雅集最為盛蓋壽其所宜壽樂其所可樂有詩  
文以紀其實有繪史以圖其像故稱於當時傳  
之後世使人景慕之至于今不衰本

朝正統初楊文貞公諸老作雅集於楊文敏之杏  
園蓋有慕乎蘇也成化末尚書王宗貫諸賢以  
壽俊名會在南都之天界寺蓋有慕乎文也弘  
治己未太子太傳吏部尚書四明屠公都察院  
右都御史鄆城佶公及愚三人皆庚申生歲當  
六十部院諸寅友以優躋下壽可醵而壽也又

以吾竹園清敞可聚而樂也預屬治具乃五月  
庚申朔諸公畢至而錦衣二呂君用謝庭循故  
事亦拉以來地幽景清肴豐酒冽於是交相獻  
酬禮儀卒度談譁以暢情絲竹以助歡何其適  
哉况先是天濟以雨而浮塵浥是日復雨而炎  
暑消茂竹挺翠薰風送爽天意人情於是乎交  
悅焉吏侍長洲吳公倡以唐律一首舒城秦公  
繼集古詩三章愚也不學亦效顰一律諸公欣  
欣然各把筆通和成卷其二呂君則窮物態即



琴尊寫之為圖而諸公之像各逼其真噫蓋合  
文蘇之舉而為一以壽以樂不亦盛哉屠公既  
屬吳公序于前復命愚識其後愚惟天下之事  
能傳而不泯固有因地之勝文之雅及繪事之  
精者然使人匪其才雖文繪奇絕亦將有厭而  
棄之矣潞公東坡及我三楊二王并宗貫諸公  
卿其才識文學豐功盛烈載之史冊播之天下  
雖不藉圖繪自不可泯况復有李龍眠謝庭循  
之能事哉今諸公及愚幸際

明時得以休休燕逸成此嘉會雖企及諸先正也未  
易然竭忠以答

寵貺亦未敢緩尚圖各有修立以保終譽以求無忝  
則并二呂君傳之久遠無厭於人可卜矣

資政大夫太子少保戶部尚書前翰林院侍讀  
左春坊中允直

文華殿講讀兼修

國史太原周經序



竹園壽集跋

右竹園壽集圖一卷弘治己未之夏是爲戶部  
尚書太原周公壽辰群公集賀于周公之私第  
觴宴既陳篇什斯倡而圖所由作也吏侍匏菴  
吳公實叙其事嗚呼

本朝治理人物至弘治間號稱極盛矣

孝皇躬親庶政簡任賢雋登之大僚而優禮敬焉故  
仕于時者咸得發舒其蘊以盡輔理承化之責  
又獲以其暇日徜徉于文墨罇俎之間觀斯圖



者尚可想見當時之盛使人歆慕嘆羨有欲執  
鞭之想也今少保太冢宰靈寶許公家藏此卷  
近復加裝飭命其弟光祿少卿諭示嵩使題其  
後蓋公之考襄毅公昔為戶侍時預茲集繪像  
及和章俱在宜其世守而珍藏之也然距今四  
十有二載卷中名鉅皆淪謝太宰公父子相繼  
秉銓衡伯仲位上卿群從列仕籍慶祚流衍勲  
庸輝映觀者又可知許氏之盛矣非孟子所謂  
國之喬木世臣者歟敬題而歸之

嘉靖庚子孟秋袁郡嚴嵩書于南宮之署

璘生也後幸際

敬皇之朝獲觀先正諸大老典刑于時朝制清嚴士  
風忠厚六省百司之政較若畫一公卿大夫進  
則奉都俞契合之風退有德義從游之樂政行  
文學師師交讓絕無所謂讒譖妬媚趨競籠絡  
之嫌何其盛哉殆今僅五十年耳竊考其風俗  
比量其行事乃或有不盡然者不知何從而始  
變又何從而始可返也每為之浩嘆一日廷尉



默齋許公持先太保襄毅公與太原周公輩竹  
園壽集卷過璘示觀讀其文誦其詩瞻其遺像  
儼然如登

先朝敬侍諸公之側歛衽之餘慰樂無斁唯夫言詞  
之所難宣圖畫之所難形者又安得復接于耳  
覲于目哉所謂沒世不忘正此之謂也璘於諸  
公皆嘗親望眉宇若襄毅公與周公及姑蘇吳  
公舒城秦公則既數承教矣流風餘韻尚有得  
于彷彿間乎願詳告于來學共圖其返謹謝黑  
齋致語大宰松皋年丈公及諸賢子弟慎寶此  
卷其無減于夏鼎殷彝之為古哉

嘉靖癸卯上元日南京刑部尚書姑蘇後學顧  
璘題

竹園壽集與者凡十人皆名公也而靈寶許公  
姑蘇吳公四明屠公尤著其詩凡四十五章前  
後序各一語皆平正典雅而戒勉之意忠孝之  
大節時時見焉讀之可知其人也自弘治已  
未至於今五十有五年先輩名蹟後生知者蓋



鮮此卷子幸從許公之子司馬默齋公觀之司馬謂余曰吾家蓄古圖書頗多然吾所寶藏未有與此比者也蓋司馬愛敬其親故知所重如此於戲有欲知許氏之世德者此不足以徵乎

嘉靖癸丑仲冬朔華亭徐階書

大學士

語有之太平時人多壽德壽足以致太平予觀竹園壽集卷而知斯言之非虛也弘治間文恬武熙時和歲豐海內晏然有以哉昔白樂天九老會皆高年不仕者文潞公耆年會致仕者過

半焉當時尚圖而傳之千載以為美談今竹園集諸公晉秩保傳躋位卿佐

朝廷所倚毗士類所歸心稱達尊於天下而共致太平者無出於此非特能老而已被九老耆年之會又豈可同年語耶展卷瞻對典刑攸在慶幸嚮往之懷誰能已之則是圖之在天壤間雖拱壁不過也宜默齋藏以為至寶默齋公今司馬即會中靈寶許公之子

嘉靖甲寅仲春望日餘姚李本識

大學士



余生也晚於諸公蓋嘗慨慕其人今覽斯圖其  
於世道之隆名位之盛友誼之篤與夫藻翰之  
麗繪事之精如親悵其丰神光景增遐想歆羨  
於數十年之上何其幸也夫諸公之為斯圖固  
欲貽其後世守之也今從 默齋司馬公得觀  
焉則 襄毅公福慶之綿邈又不獨 函谷莊  
敏公松臬文簡公奕葉雲仍將益衍而昌大之  
可期卜也且余與 公同舉諸禮部同試政於  
司馬今特奉

命來督軍務從容暇晏代諸尊俎間不其難歟間出  
此相示爰命之言又何幸附名於不朽也若夫  
追先正之懿著交遊之踪得託繪事使後之視  
今亦猶今之視昔以傳世講余於 公不能無  
厚望焉

嘉靖甲寅季夏朔東郡蘇祐識

兵部尚書

夫人倫之大惟忠與孝孰不為忠忠不忘其君  
者斯忠之大孰不為孝終身不忘其親者斯孝  
之大予於竹園壽集有感焉集乃



孝皇中靈寶袞毅公諸老以壽燕而作也裝而為卷  
有圖有詩圖有諸老小像有修篁茂樹奇石瑤  
草詩有律有集古儀度閑適唱和更迭讌飲懽  
洽規戒懇切 盛世太平景象宛然在目蓋當  
時明良相得道久化成熙恬無為故得以暇日  
有此樂事否則倥傯焦勞日不暇給其何能燕  
且詩焉說者謂太和我

朝弘治間與成周比良有見也然予且有說焉夫圖  
以繪形詩以言志故尚論古人者必頌其詩而

善說詩者以意逆志今觀袞毅公詩有云讌歌  
以詠四字和平又云報 德難忘玉燭因是詩  
也非徒以玩物寄興狀情寫景云爾蓋袞毅公  
平生忠君愛國本於中心之誠故雖杯酒談笑  
間自不覺其性真之呈露也乃其季子中丞默  
齋公一日囊是集過示且曰予家遭逆瑾之毒  
積帙盡逸惟此卷秘藏獨存迄今五十餘年每  
官遊輒携以隨時一披閱思先君嚴範誦其遺  
音愧未能繼述為憾願為我一言以遺後之人



言已戚形于色嗚呼默齋公可謂終身不忘其親者矣予未及見襄毅公乃今幸獲侍默齋公教其籌邊經國許謨遠猷多出人智慮所不及而函谷松臯伯仲相繼揆衡皆以道德功業流聞于時今諸子若孫承箕裘而世濟其美者又彬彬焉多才德然則是集也當與黃河華嶽同其流峙焉可也

嘉靖辛亥季冬望日督理山西宣大地方屯牧都察院右僉都御史海濱後學生王達書

二園集叙

正統丁巳楊文貞諸公會于楊文敏公之杏園曰雅集弘治己未屠襄惠諸公會于周文端公之竹園曰壽集各有繪像篇什皆太平盛事也壽集先襄毅公曾預其列舊有卷雅集卷則論巡撫太原時始得于文端公之孫而摹之并藏於家於是公卿聞者必求觀觀者莫不慨然興懷若登唐虞之廷觀皋夔之列聰明良之音歆慕嘆羨之不足甚至形之贊頌有願執鞭之想嗚呼諸公何以得此



於人哉蓋至尊者道至貴者德有於身心則萬民  
所望加于上下則沒世不忘而況當重熙之

朝荷優禮之寵不徒爵位之顯榮又得晏然于遊覽  
觴咏之間鍾鼎彝鼎咸有其樂是宜乎觀者敬而  
羨慕之也于時有善繪事者乃命摹而刻之名曰  
二園集以應求觀者之請亦以告我後之人思所  
以克肖吾名公題跋並附於後

嘉靖庚申三月朔日

賜進士第光祿大夫太子太保兵部尚書兼都察院

弘治何如時也諸老何如人也魯生也晚幸睹  
其形似而讀其篇章因以想象乎當時景慕之  
下感慨繫之矣易曰書不盡言言不盡意愚於  
此卷也亦云

嘉靖庚戌除夕前二日後學西京許宗魯題

竹園壽集集弘治己未夏仲四日槐棘諸侍從  
壽

宮保周公倡和篇什也按圖同壽宴者自許襄  
毅公而下凡十大老垂金兼紫怡情於翠微芳



451  
緒之間觴詠從容聯珠賡玉則夫當時論道經  
邦師師讓德之風藹然於繪藻之外治世之日  
舒以長固不可想其盛欤距今嘉靖辛亥閱載  
五十有奇是年襄毅公季子默齋公以大中丞  
保釐山右珍藏是卷以隨余時亦以觀風至與  
默齋公肅工飭度籌邊綏內憂瘁同心偶暇出  
壽集以示余受而終篇觀諸先哲儀刑若登堂  
隅瞻候顏色誦其篇章如面命教指令人寤寐  
神交數十載之前尚賢諸老之心躍如於中不

能自己卷載與會諸老皆有藏本余未獲盡識  
而默齋公奕世簪祖父子兄弟代筦銓衡群別  
大僚方今海內號稱世臣之家未之或能先也  
默齋公以間出之英道隆位崇天下方望霖雨  
行且入總樞要變贊

皇猷而諸孫子多賢競爽明德其有極乎夫許氏之  
重固在斯卷也而斯卷永傳不將於許氏有賴  
乎我

朝優敘元臣而世賢承德恭靖明良孚契之意固因



圖有考也是又有以関

國家熙洽之運矣許氏之慎守而世寶也固宜

嘉靖三十年辛亥夏四月既望

賜進士第巡按山西監察御史後學開州吉澄題

國朝稱治化之隆人文之盛必稽諸

孝廟云然豈待博考而後知哉即以今默齋翁所  
授竹園壽集觀之亦大略見矣想夫一德咸有  
上下志同無怨無惡率由群工於維老成當代  
夔龍思日贊襄協恭和衷自公退焉宴會從容

眉壽是介其樂融融賓主既洽用矢厥音金聲  
玉振雅頌式陳樂彼之園綠竹青青有斐君子  
維爾之朋爾游爾休殆不知帝力之何有無我  
無物相與忘形於大道之中君臣之義朋友之  
交宛然泰和氣象也噫觀者可以興矣然則是  
集也豈直為諸老之壽云哉王道將為昭焉噫  
是可集也

山西按察使上谷後學李綸謹題

孝皇御極兢業圖幾百工飭度六府承式祈天永命



無彊惟恤惟時橐鞬弗試三垂宴然群生嘉悅  
在朝薦紳咸以翰墨相尚言崇德義行鮮儼媚  
泰和元氣充溢宇宙皞皞如也適觀竹園壽集  
卷載弘治己未夏襄毅文端諸老醵壽倡和篇  
什猗與昌期雅樂誠非一時諛言一身私壽也  
已壽君壽國壽民厥咸有徵哉粵惟聖王之作  
必有壽耆之佐我聞周公之告召公曰天壽平  
格保又有殷是天維純佑殷國篤生保衡大臣  
錫之壽考蓋將以壽君國與召民也豈獨為之

壽哉即其克殫平格而荷配天永命之休則周  
召之所以相期者果非誣也是故耆年師保夾  
輔王室坐致迓衡固命顯周燕魯之封濟美同  
休壽之極也斯之謂壽也竹園之壽其知道乎  
若徒觴詠是娛而鮮克約禮頌禱交侈而弗協  
於義於是乎嚙脊背憎而作祝靡究者有矣則  
壽之者為誕辭樂之者為淫行乃底滅威亦罔  
或克壽雖壽何益故觀竹園之樂盍繹思諸老  
先憂之至者乎於稽其行同寅協恭明最永念



丕承周召無疆之恤其心將有不能一日安者  
則亦何樂之有是故於先憂可以察無為之治  
矣於後樂可以攷有象之時矣然則是卷之壽  
之樂而豈徒執君德之懋臣道之脩國運之泰  
治化之隆感於此乎稽矣

提學副使吾丘閔煦謹題

竹園壽集者先正諸名公當重熙累洽之際抱  
同心一德之忱值三公花甲之偕週運一時藻  
思之不容已者也象而一草木韻而一語言太

和氣象藹然可掬乃其有餘不盡之意固有一  
唱而三嘆者夫致治之道保治之規也遠古以  
來則然矣粵若臯益都兪周召答問意致懇切  
每溢於形跡之外古今大臣為

國家深長之思豈相遠耶是集也默齋公珍藏有年  
且奉以周旋矣茲乃出於保釐之餘吾人獲縱  
觀焉噫豈可徒玩其象誦其詞而已哉

副使東郡後學張鈇題

嘗讀書至百僚師師及朋家作仇之言未嘗不



嘆我

孝廟治理之隆人文之盛也憶昔唐虞之際百僚更相推讓下迨商末彼此廼互為其仇矣今觀竹園壽集頌其詩讀其文懸想當時諸老同寅協恭和衷一德進而論道經邦退而飲食宴樂其師師之風真可以追休臯夔稷而讒譖仇讐之事較之有商叔季之諸臣殆迥乎其不侔矣觀是集者當時人文之懿後人仰止之心悉見之矣然則是集也雖傳之天下共珍之可也豈但

許氏所當珍者乎

僉事三原後學梁木謹題



